



MAHFAR (empat dari kiri) beramah mesra dengan penaja Seminar Bimbingan Peperiksaan BH 2016. Turut kelihatan Pengarang Eksekutif, Berita, Rencana dan Digital BH, Ahmad Zaini Kamaruzzaman (kiri) dan Pengarang Eksekutif Pengeluaran, Percetakan dan Digital Berita Harian, Rosli Safar (kanan).

Dapat tajaan RM4 juta

■ BH yakin dapat anjur lebih banyak seminar untuk calon UPSR, PT3 dan SPM

Oleh Syarifah Dayana Syed Bakri
dayana@hmetro.com.my
Kuala Lumpur

Seminar peperiksaan yang dianjurkan Berita Harian (BH) tahun ini mendapat tajaan lebih RM4 juta dan jumlahnya dijangka terus meningkat khususnya dengan kehadiran penaja baru.

Pengarang Kumpulan BH, Datuk Mahfar Ali berkata, berikutan lebih banyak tajaan diterima tahun ini, pihaknya akan mengadakan lebih banyak seminar peperiksaan untuk calon Ujian Penilaian Sekolah Rendah (UPSR), Pentaksiran Tingkatan 3 (PT3) dan Sijil Pelajaran Malaysia (SPM).

“Pada tahun lalu tajaan yang diterima adalah sebanyak RM3.5 juta dan kami berjaya menganjurkan kira-kira 223 siri seminar peperiksaan.

“Pada tahun ini, jumlah tajaan terus meningkat dan lebih 250 siri peperiksaan dijangka dianjurkan di seluruh Malaysia,” katanya

selepas majlis penyerahan tajaan di Balai Berita, The New Straits Times Press (M) Berhad (NSTP), di sini, semalam.

Antara penaja yang hadir adalah Management & Science University (MSU), Yayasan Bank Rakyat, Malaysian Resources Corporation Berhad (MRCB), UEM Sunrise Berhad dan Yayasan Gabungan Pelajar Melayu Semenanjung (YGPMS).

Menurutnya, pada tahun lalu, hampir 60,000 calon UPSR, PT3 dan SPM mendapat manfaat daripada program yang dijalankan dan jumlahnya terus meningkat pada tahun ini.

“Seminar ini dijalankan di seluruh negara, termasuk Sabah dan Sarawak.

Malah, kami juga memberi tumpuan kepada sekolah yang terletak di bahagian pedalaman bagi memberi peluang kepada kelompok ini mendapat bimbingan dan panduan sebagaimana calon peperiksaan di kawasan bandar,” katanya.

Mahfar berkata, bagi

“ Pada tahun ini, jumlah tajaan terus meningkat dan lebih 250 siri peperiksaan dijangka dianjurkan di seluruh Malaysia. Seminar ini dijalankan di seluruh negara, termasuk Sabah dan Sarawak”

Mahfar Ali

menghargai sokongan pelanggan akhbar, BH akan menganjurkan seminar percuma untuk 1,000 calon PT3 di Universiti Putra Malaysia (UPM) pada 5 Mac 2016.

“Seminar ini sebagai tanda penghargaan kami kepada pelanggan akhbar BH, khususnya mereka yang menjadikan sisipan Minda sebagai rujukan dalam pembelajaran,” katanya.

Siri seminar peperiksaan anjuran BH bermula sejak Februari lalu dan akan berakhir Oktober nanti.

FAKTA
BH akan anjur seminar percuma untuk 1,000 calon PT3 di UPM pada 5 Mac 2016